

## Dat kannst' mi glöven - Plattdeutsche Andachten

Montag bis Freitag, 14.15 Uhr (NDR 1 Niedersachsen)

**05. bis 09. September 2022 - "Worum hest du mi neet inladen"**

**Von Marion Steinhorst-Coordes, Pastorin in Uplengen-Remels.**

Man erlebt so einiges: Mal gibt es die gewohnte Tagescreme nicht mehr, mal wird man nicht mit eingeladen, mal freut man sich über die 10.000 Kilometer, die das E-Bike anzeigt, davon erzählt Pastorin Marion Steinhorst-Coordes. Mit viel Humor. Und mit dem Vertrauen auf Gott, der uns alle wunderbar gemacht hat und nichts anderes als Frieden für seine Menschen will.



**Marion Steinhorst-Coordes**

Redaktion:

Anita Christians-Albrecht  
Pastorin und Beauftragte für Alten-  
seelsorge in der hannoverschen  
Landeskirche

Veröffentlichung:

Evangelische Kirche im NDR  
Redaktion Hannover  
Knochenhauerstr. 38-40  
30159 Hannover  
Tel. (0511) 32 76 21  
[www.ndr.de/kirche](http://www.ndr.de/kirche)

Dieses Manuskript ist urheberrechtlich geschützt und darf nur für private Zwecke des Empfängers benutzt werden. Jede andere Verwendung (z.B. Mitteilung, Vortrag oder Aufführung in der Öffentlichkeit, Vervielfältigung, Bearbeitung, Übersetzung) ist nur mit Zustimmung der Ev. Kirche im NDR zulässig. Die Verwendung für Rundfunkzwecke bedarf der Genehmigung des NDR.

### **Maandag, 05. September 2022 - Beter Formel**

Jetzt mit verbesserter Formel! Ik stah vör dat Regal mit de Creme, de ik al siet Johren bruuk. De is allerbest, beter geiht dat neet, un de will ik weer hebben. Jüst de. Man nee. Ik fraag 'n Verkäuferin. Die wurden aus dem Sortiment genommen. Nu is dat 'n "beter Formel", verkloort se mi, un de Verpackung is ok mojer, de se mi unner d' Nöös hollt. Och nee! Denn hest du di dor net an wennt, genau de, de wullt du weer hebben – un denn is de de neet mehr bi. Ruutnomen, neet mehr gaud genug. Sie haben Glück, flötet de Verkäuferin, der Preis ist gleich geblieben. Ja, segg ik, dor man is ja bloot noch half so vööl in. Gaud, dat ik neet so'n Creme bün. Ik weer al lang rutnomen west ut dat Sortiment. Bün al 62. De Verpackung is neet mehr soo un de Formel ok noch ut de fieftiger Johrn. As Gott uns Minschen maakt hett, do löppt he an d' Enn an dat Minschen-Regal lang un seggt: Watt mooi. Wunnerbor! Heel good! De witte Verpackungen un de schwarten, de olle Rezeptur un de neje Formel - se stahnt bi hum all tegen'nanner. Ok de, de al oflopen sünd of wor de Verpackung kött of inbuult is - allerbest, seggt he. Haar neet beter kunnt. Un dat, wat dor in is, dat word mit't Oller neet schlechter. Dor wull ik doch nix van missen, keen Dag, keen Traan, keen Lachen – all, wat di tau dat maakt hett, wat du büst. Allerbest!

### **Dingsdag, 06. September 2022 - Dat is gaud so**

Wat sach ik dor tegen an. Se weer schwoor krank - un dat wuur ok neet weer beter. Dat wuss se sülmst ok. Un so'n Schwoorranken besöken - dat fallt mi alltied noch stuur. Man dat nütz nix. Ik muss dor hen in dat Pflegeheim an hör Bedd.

Un wenn se nu nix seggen dä?

Un wenn dat nu heel Tied still weer?

Und wenn se brullen dä?

Un wenn se mi heel neet sehn wull?

Watt sull ik bloot maken?

As'n Steen lagg dat in mien Maag.

Sacht maak ik de Döör open. Koom rin, röppt se mi taumood. Dat freut mi, dat du mi besöchst. Un do hebben wi mi'tnanner proot' un lacht' un vertellt. Man irgendwanner kann ik neet anners: Segg eben, wo kannst du dat, so blied wesen, wor du doch so krank büst. Se lacht. Ja, wahrhaftig. Se lacht. Ik kann nu ja anners nix maken, seggt se. Man Tied hebb ik tau Nahdenken. Un dat hett mit mehr nah Gott henbrocht. Dat is mien Anker, dor holl ik mi an fast. Dat hett all so wesen sullt. Un dat is gaud so.Ok as ik al weer in Huus bün, gahnt mi hör Worden neet tau d' Kopp ut. Un dat is gaud so – hett se seggt. Wat'n Segen, wenn man sien Elend so ut Gott sien Hand annehmen kann.

### **Mittweek, 07. Septemeber 2022- Neet inladen**

He wuur 60. Un wull groot fiern. All weern se inladen - all - bloot ik neet. () Frünn - inladen. Kollegen - inladen. Nahbers - inladen. Hmmm...Wi kunnen doch all Johren gaud mit'nanner ... Worum bün ik neet inladen? Dat geiht di denn ja neet tau d' Kopp ut. Hebb ik wat Verkehrts seggt? Hebb ik wat vergeeten, wat ik hum tauseggt haar? Ik hebb mit de Kopp kött docht, man mi full nix in. Van mien Siet ut, meen ik, kunnen wi best mit'nanner. Of he dat anners sach? Fragen magst denn ok ja neet: Du, worum hest du mi neet inladen.

Dat deit man ja neet. Un nu was de Dag dor. He haar de groode Koppel an Minschen mörgens tau't Frühstück inladen – man ik höör dor ja neet tau. Ik keek up d' Uhr. Half teihn - nu satten se all bi'nanner. 'n bietje seer dä mi dat doch. Up maal klingelt Telefon. Dat Geburtstagskind. Du? Ik stotter. Ääh... ik graleer di ok ... Och man, seggt he. Ik hebb vergeten, di intauladen. Wi sitten hier all un do is mi upfallen, dat du heel neet up mien List stunnst. Kannst mit dat nahsehn? Kannst du nu noch gau komen? Wi sünd noch neet anfangen... He hett mi vergeten! Ik kann gor nich uptellen, wat mi all dör d' Kopp geiht: een bietje trüig bün ik. Een heel bietje düll ... un blied, ja blied bün ik ok. Wat sall ik nu maken? Ik overleeg ... Du, ik spring gau in't Auto - ik bün in fiev Minüeten dor. So wat kann passeern.

### **Dünnerdag, 08. September 2022 - Die Bombe tickt ...?**

Die Bombe tickt ... Mien Konfirmanden mögen dat so gern spölen. Een maakt Oogen dicht un tellt sacht bit teihn. In de Tied geiht een Ball rum, van een Hand in d' anner. Wenn de, de tellt, denn bi teihn is, seggt he "Boom"! Un de de Ball denn net in d' Hand hett, mutt utscheeden. Wat hebben wi dor al'n Spaaß bi hat, wenn dat "Boom" heet un een nah d' anner ruut is ut dat Spööl. Die Bombe tickt – johrenlang hebben wi dat spöölt. Man nu mag ik dat neet mehr. Watt seggen wi dor? Die Bombe tickt? Boom?! Nu, wor in d' Ukraine Krieg is, stött mi disse Satz up. Dor fleegen recht' Bomben in d' Luft, un Minschen sünd ruut ut dat Spööl, sünd ruut ut dat Leven. Anners hebb o ik ok al faker so'n Blödsinn seggt: "Mit de kannst ja keen Krieg winnen" - wenn dat een is, de neet so fix is. "Auf in den Kampf" sä ik woll mal an mi sülms, wenn dor 'n Barg Arbeit lagg. Wat bün ik dumm west!

Gott seggt: Ik geef jau Free, dat ji hopen können.

Gott seggt: Maakt ut jau Schweerten 'n Ploog.

Gott segt: Ik denk an Free, un neet an dat, wat jau Hartseer maakt.

Die Bombe tickt - dat seggt Gott neet. Un dat will ik ok nooit weer seggen un nooit weer mit Konfirmanden spölen. Nu heet dat Spööl bi uns: De Aap bölkt. Un bi teihn heet dat denn Uhuhu - net as in d' Urwald.

### **Freedag, 09. September 2022 - 10.000 Kilometer**

Wach eben! rööp ik achter mien Mann an. He is al'n bietje vörfohrn mit sien Ebike. Koom eben, ik mutt di wat wiesen. Hier, segg ik, musst eben kieken. Mien Tacho – genau 10.000 km. Ik kann mi heel neet satt kieken an de moje Taal. Een een mit veer Nullen. Perfekt. För een Moment. Dit is de Dag, de Gott maakt, steiht in d' Bibel: Dor sünd wi blied over un freuen uns. De Dag, de Minüüt, de Sekund – de Gott maakt - dat langt al. 15 Punkten in'n Klausur. Anner mal weer bloot söven. Of kummst van d' Frisör un dien Hoor sitt perfekt. Nah d' Middagstünn steiht dat denn weer all Kanten an. Jüst up Stünd is so vööl krumm un scheef up uns Welt. De Krieg in d' Ukraine maakt uns Sorgen, un of wi vanwinter in 't Warmd sitten, weeten wir ok neet. Darum bruken wi open Oogen för de een Moment, wenn dat löppt – un mooi is – perfekt. Mien Mann kikkt up mien Tacho. Dorum hollst du an? He schmüster. Is dat denn wat anners as 798 of 5452? Koom, wi fohr wieder, seggt he un sitt al weer up d'Saddel. Ja, mutt ja. Man am leevsten würr ik mien Achterrad hochtilln, dat de Tacho alltied so stahn blifft - up de 10.000. Man dat geiht wieder. 10.001. 2. 3. Oildaag, krumm un scheef. Man van de een Moment kann ik teeren - de Moment, de Gott maakt hett - dor bün ik blied over un freu mi.